

PRIJEDLOG

Na osnovu člana 37. stav 1. tačka f) Ustava Zeničko-dobojskog kantona, a u vezi sa članom 25. Zakona o visokom obrazovanju („Službene novine Zeničko-dobojskog kantona”, broj: 6/09, 9/13, 13/13 i 4/15), Skupština Zeničko-dobojskog kantona, na ____ sjednici, održanoj _____ 2016. godine, donosi

ODLUKU

o usvajanju Elaborata o društveno-ekonomskoj opravdanosti promjene naziva i proširenja djelatnosti Zdravstvenog fakulteta Univerziteta u Zenici

Član 1.

Usvaja se Elaborat o društveno-ekonomskoj opravdanosti promjene naziva i proširenja djelatnosti Zdravstvenog fakulteta Univerziteta u Zenici.

Član 2.

Odluka stupa na snagu narednog dana od dana objavljivanja u „Službenim novinama Zeničko-dobojskog kantona“.

Broj: 02-_____/16.

Datum,

Z e n i c a

PREDSJEDAVAJUĆA

Draženka Subašić, s.r.

DOSTAVLJENO:

1x Ministarstvo za obrazovanje, nauku, kulturu i sport,

1x Univerzitet u Zenici - Rektorat, Fakultetska 3, (putem Ministarstva),

1x a/a.

Obrazloženje

Pravni osnov

Pravni osnov za donošenje ove odluke temelji se na članu 37. stav 1. tačka f.) Ustava Zeničko-dobojskog kantona i na članu 25. Zakona o visokom obrazovanju ("Službene novine Zeničko-dobojskog kantona", broj: 6/09, 9/13, 13/13 i 4/15).

Razlozi za donošenje

U skladu sa odredbama člana 25. Zakona o visokom obrazovanju („Službene novine Zeničko-dobojskog kantona“, broj: 6/09, 9/13, 13/13 i 4/15), osnivač visokoškolske ustanove usvaja elaborat o opravdanosti statusnih promjena i donosi odluku o statusnim promjenama. Statusne promjene, u ovom slučaju, odnose se na promjenu naziva Zdravstvenog fakulteta u Medicinski fakultet i proširenje djelatnosti organizovanjem studijskog programa Opća medicina.

Na prijedlog Naučno-nastavnog vijeća Zdravstvenog fakulteta, Senat Univerziteta u Zenici je donio **Odluku o usvajanju Elaborata o društveno-ekonomskoj opravdanosti promjene naziva OJ Zdravstveni fakultet Univerziteta u Zenici u OJ Medicinski fakultet Univerziteta u Zenici**, broj: 01-02-6-2199/15. od 24.06.2015. godine.

Ova odluka Senata je upućena Upravnom odboru Univerziteta u Zenici na dalju proceduru. Upravni odbor Univerziteta u Zenici je donio Odluku o prihvatanju inicijative Senata Univerziteta u Zenici o usvajanju Elaborata o ekonomsko–društvenoj opravdanosti promjene naziva OJ Zdravstveni fakultet Univerziteta u Zenici u OJ Medicinski fakultet Univerziteta u Zenici, broj: 01-01-1-2438/15 od 14.07.2015. godine.

Na prijedlog Naučno-nastavnog vijeća Zdravstvenog fakulteta, Senat Univerziteta u Zenici je donio i **Odluku o usvajanju Elaborata o ekonomsko–društvenoj opravdanosti pokretanja studijaskog programa „Opća medicina“**, broj: 01-02-6-2200/15 od 24.06.2015. godine. Upravni odbor Univerziteta u Zenici je donio Odluku o prihvatanju inicijative Senata Univerziteta u Zenici o usvajanju Elaborata o ekonomsko–društvenoj opravdanosti pokretanja studijaskog programa „Opća medicina“, broj: 01-01-1-2439/15 od 14.07.2015. godine.

Odluke su dostavljene Ministarstvu za obrazovanje, nauku, kulturu i sport kako bi se uputile u dalju proceduru dobijanja saglasnosti od Osnivača Univerziteta.

1. Promjena naziva Zdravstvenog fakulteta u Medicinski fakultet

Zdravstveni fakultet mijenja naziv u Medicinski fakultet sa dva studijska programa: **Opća medicina** (novi studijski program) i **Zdravstvena njega** (postojeći studijski program).

Edukacija medicinskih radnika je jedna od najznačajnijih oblasti u okviru univerziteta u okruženju. U Bosni i Hercegovini postoji veći broj zdravstvenih fakulteta, a samo nekoliko univerziteta ima i Medicinski fakultet. Ovi fakulteti su obavezni dio univerziteta u Ljubljani, Zagrebu, Rijeci, Splitu, Beogradu, Podgorici, Skoplju te u našoj zemlji univerziteta u Sarajevu, Banjoj Luci, Mostaru, Tuzli i Istočnom Sarajevu.

Iako se čini da ovi fakulteti proizvode veliki broj ljekara evidentna je deficitarnost ovog kadra, kako u našoj zemlji tako i u najvećem broju evropskih zemalja. Studij medicine traje 6 godina, pa se mali broj studenata odlučuje na ovako dugotrajan i težak studij, koji uglavnom u roku ne završavaju zbog težine studijskog programa. Zato ne dolazi do hiperprodukcije kadra.

Otvaranjem tržišta Evropske unije javlja se odliv ovih kadrova i njihova deficitarnost je sve izraženija. Danas su ovi kadrovi vrlo perspektivni, traženi i nema ih na biroima za zapošljavanje.

Značaj promjene naziva Zdravstvenog fakulteta treba sagledavati iz najmanje tri osnovna ugla. Prvi je sve izraženiji zahtjev šire društvene zajednice da se na Univerzitetu u Zenici osiguraju uvjeti za studiranje svih onih disciplina koje ta zajednica traži. Ovaj zahtjev zajednice nije ispunjen, što dokazuju podaci o velikom broju mladih ljudi sa područja Zeničko-dobojskog kantona koji, zbog nepostojanja studijskih programa na Univerzitetu u Zenici, studiraju na drugim univerzitetima, posebno u Sarajevu i Tuzli.

Zdravstveni fakultet Univerziteta u Zenici ima mogućnost širenja svojih kapaciteta te time može odgovoriti na sve izraženije zahtjeve zajednice za obogaćivanjem studijske ponude.

Na ovaj način se može postići potrebna širina i omogućiti otvaranje novih dodiplomskih, postdiplomskih i doktorskih studija iz raznih medicinskih oblasti, te na taj način mladim ljudima iz Zeničko-dobojskog kantona i šire omogućiti studiranje koje će biti znatno povoljnije s finansijskog aspekta.

1.1. Finansijski pokazatelji

Promjena naziva Zdravstvenog fakulteta u Medicinski fakultet ne iziskuje nikakva dodatna finansijska sredstva.

2. Proširenje djelatnosti organizovanjem studijskog programa Opća medicina

U identifikiranju strateških pravaca razvoja obrazovanja i naučno-istraživačkog procesa, kako u Zeničko-dobojskom kantonu, tako i u Federaciji BiH i u BiH, važno je postići optimum između zahtjeva za racionalizacijom u korištenju ograničenih resursa i koncentracijom na manji broj odabranih strateških pravaca, s jedne strane, i potrebe da se razvojem obuhvate ključne oblasti razvoja naučno-istraživačkog rada, s druge strane.

Stoga, okvir za identifikiranje strateških pravaca treba biti, kako globalizacijski okvir razvoja društva, tako i bitna usaglašenost između razvoja tehničkih, društveno-humanističkih i medicinskih nauka, što sada nije slučaj. U tome Zdravstveni fakultet i Univerzitet u Zenici trebaju naći prostor da se odgovori zahtjevima društva, posebno u obrazovanju deficitarnog kadra. Time će se izbjeći odliv svršenika srednjih škola na druge univerzitete koji im omogućavaju studiranje na bilo kojoj naučnoj oblasti, odnosno studijskoj grupi. Širenjem takve obrazovne ponude, odnosno statusnim promjenama koje to omogućavaju, kreira se društvena infrastruktura i svojevrсни društveni kapital koji će utjecati na uravnotežen društveni razvoj Zeničko-dobojskog kantona.

Pravci razvoja visokog obrazovanja u Zeničko-dobojskom kantonu treba da se orijentiraju ka razvoju sistema visokog obrazovanja po najboljoj evropskoj i svjetskoj praksi, a to znači povećanje stope upisa na Univerzitet, povećanje ponude novih studijskih odsjeka, veću efikasnost studiranja, internacionaliziranje studija, veći stepen mobilnosti i povezanosti tržišta rada sa visokim obrazovanjem, te prepoznatljivu i priznatu diplomu kao mjerilo znanja i dostignutih kompetencija.

Na ovaj način, što nije zanemarivo, smanjit će se odliv finansijskih sredstava sa područja našeg kantona u druge sredine. Drugo, postepenim razvojem nedostajućih studijskih programa, koje osigurava ova transformacija, doći će do zaokruživanja svih drugih naučnih polja iz sfere medicinskih nauka, prijedku potrebnih društvenoj zajednici. Ovo se posebno odnosi na jačanje medicinske komponente koja, do sada, nije imala adekvatnu osnovu za razvoj na Univerzitetu u Zenici.

Treće, ova transformacija omogućava razvoj i Kantonalne bolnice Zenica u Univerzitetu Zenica što će dovesti do razvoja i unapređenja medicinske usluge u Zeničko-dobojskom kantonu, a na dobrobit svih stanovnika Kantona i šire.

Medicinski fakultet će koristiti postojeće resurse Zdravstvenog fakulteta. Dekan, prodekani, sekretar, studentska služba su zajednički za oba studijska programa. Naučno-nastavna baza za Medicinski fakultet je Kantonalna bolnica Zenica.

Pretklinički dio studija će biti organizovan u saradnji sa Katedrom za hemiju i fiziku pri Fakultetu za metalurgiju i materijale, koristiti će se laboratorije Metalurškog instituta „Kemal Kapetanović“ te postojeće laboratorije Kantonalne bolnice Zenica.

Katedra za anatomiju kao bazni predmet na Medicinskom i Zdravstvenom fakultetu je adekvatno opremljena i spremna za edukaciju. Nastava će se održavati u postojećim prostorima koje koristi Zdravstveni fakultet te drugim amfiteatrima u sklopu Univerziteta, a prema dogovoru dekana, rektora i Senata Univerziteta. Pored toga, Kantonalna bolnica posjeduje još jedan amfiteatar koji nije potpuno uređen i može se, nakon izvođenja završnih radova, staviti u funkciju. Ovaj amfiteatar se nalazi u zgradi Stacionara.

Nastavni kadar je najvećim dijelom već angažovan na Zdravstvenom fakultetu i ima potrebne reference za rad na Medicinskom fakultetu. Više od 50% nastavnika i asistenata su naučni radnici iz Zeničko-dobojskog kantona. Zdravstveni fakultet je zadnjih nekoliko godina dao doprinos ekspanziji naučnog rada kod domaćeg kadra u oblasti medicinskih nauka, dok će Medicinski fakultet dati još izrazitiji zamah u tome pogledu.

Završetkom šestogodišnjeg integrisanog dodiplomskog studija (integrisanog prvog i drugog ciklusa) studij opće medicine na Medicinskom fakultetu Univerziteta u Zenici student stiče zvanje doktor medicine. U akademskoj 2016/2017. godini planiran je upis u prvu godinu studijskog programa Opća medicina 40 redovnih i 20 redovnih samofinansirajućih studenata.

2.1. Finansijski pokazatelji

Proširenje djelatnosti Zdravstvenog fakulteta organizovanjem studijskog programa Opća medicina iziskuje ograničena dodatna finansijska sredstva. S obzirom na obim studijskog programa, ova sredstva su relativno skromna i izdaci su prihvatljivi.

U narednoj tabeli, koja je preuzeta iz Elaborata, data je procjena ukupnih troškova za šest akademskih godina i napomenom da nije uzeto u obzir eventualno plaćanje nastave u različitim institucijama.

Dinamika finansiranja

Akademska godina	STUDIJSKE GODINE	TROŠKOVI (KM)			UKUPNO
		Izvođenje nastave	Materijalni i administrativni troškovi	Kapitalni troškovi	
2016/17	1	63.500	20.000	4.500	88.000
2017/18	1. i 2.	127.000	24.000	6.000	157.000
2018/19	1., 2. i 3.	190.500	28.000	7.500	226.000
2019/20	1., 2., 3. i 4.	254.000	32.000	9.000	295.000
2020/21	1., 2., 3., 4. i 5.	317.500	36.000	10.500	364.000
2021/22	1., 2., 3., 4., 5. i 6.	381.000	40.000	12.000	433.000
I svake naredne godine po 433.000 KM					

